

【经文信息】大正藏第 21 册 No. 1375

## 佛说庄严王陀罗尼咒经 1 卷

No. 1375

### 佛说庄严王陀罗尼咒经一卷

三藏法师义净奉 制译

如是我闻。一时薄伽梵。在布怛洛迦山。为诸人天一切大众演说法要。遍观十方以妙音声。告观自在菩萨妙吉祥菩萨言。善男子有经名一切如来所护观察众生示现佛刹庄严王陀罗尼。我昔初发心时。于花光显现如来所。与九十俱胝众生。一闻此法皆得如来智慧之分咸蒙授记。于诸佛刹当得作佛。我亦于中蒙佛授记。善男子我以佛眼。观见过去三万如来。为诸众生说此法要。汝观自在及妙吉祥。于说法时皆为导首。

尔时世尊说是语已。现前大众菩萨声闻诸来听者。咸发信心供养彼佛。于时无量百千俱胝那庾多众生皆蒙授记。亦得菩萨胜妙等持。病苦悉除盖缠消灭。所愿满足善根成就。颜容端正财宝丰盈。国王大臣诸众生类见者欢喜。念慧神通无不圆备。于佛法僧得不坏信。寿命色力有大威势。无爱别离怨憎会苦。

若有善男子善女人等。能于此经五轮着地生希有心。以诸花香瓔鬘幡盖恭敬供养。归依赞叹读诵受持。

若自书写若教人书。无量功德皆悉成就。见受持者生信敬心。亦于现身众德具足。皆得菩萨胜妙等持。口中恒出栴檀香气。其目皎净如青莲叶。于昼夜中见佛形像及大菩萨。若有五无间等业障之罪。悉皆消灭诸天卫护。命终之时得见诸佛菩萨心不错乱。必得往生极乐国土。我与斯人授记作佛。彼见我身恭敬供养。于妙菩提心不疑惑。

若复有人于此法门。读诵受持供养恭敬。若自书写若教人书。及有得闻此经名者。当知此人即是菩萨应修供养。

若复此人由先恶业。财命色力内外所资悉皆短乏。所求不遂亲爱别离。国土荒残王贼衰难。由此经力现身轻受。或暂头痛或得恶衣恶食。或遭骂詈及余毁辱。往诸业障即自消除。善男子彼持经之人应生此念。我昔流转生死海中。于诸有情造作众恶。不善之业日夜增长。今时觉了不敢覆藏。发露罪源诚心忏悔。于佛法僧起不坏信。

若复彼人。曾于佛法僧宝独觉声闻父母师长作诸恶业。衣食果报皆当散尽。由经力故此业咸除衣食充足。

若复彼人有捺洛迦受苦之业。爱别离苦生盲之苦。无根二根异熟之业亦皆消灭。

又复由先嫉妬瞋恚恶业之力。当堕琰摩王界傍生饿鬼诸恶趣中。由经力故所有恶业无不消灭。一切福德悉皆增长。

善男子若于方处有此法门。彼诸人等常为此经之所拥护。功德具足所求圆满。恒受富乐恶业消除。亦无横死及诸恶梦。无有病苦鬪战常胜寿命延长。色力具足有大威势。一切世间人及天龙诸鬼神等皆随意转。不遭恶毒水火灾横。乃至由持神呪力故。常蒙诸佛之所授记。

若善男子善女人。得闻如是神呪受持读诵。若自书若教人书恭敬供养。彼善男子善女人。皆获如前所说功德。

尔时世尊说此语已。大地忽然六种震动。此诸大众以妙花香。涂香鬘盖胜妙衣服。奉上世尊同声唱言。善哉善哉我等云何。得闻如来所说神呪。尔时世尊即说呪曰。

南谟萨婆旦那揭多喃(一)但侄他(二)勃睇(三)苏勃睇(四)卢迦毘卢计(五)卢迦伐底羯嚩帝(六)萨埵阿伐卢羯泥(去七)萨婆旦那揭多阿提瑟耻帝(八)萨婆阿奢钵唎哺唎泥(去九)聚丁达囉(十)捺罗提婆布侍帝(十一)旦那揭多慎若那达睇(十二)旦那揭多阿提瑟佉泥娜(十三)萨婆卢迦速企婆跋覩(十四)萨婆羯磨钵唎钀耶野(十五)么么阿木羯写(自称己名十六)萨婆萨埵难者(十七)曷洛叉婆跋覩(十八)旦那揭多阿提瑟佉泥娜(十九)莎诃(二十但是口边作字者皆可弹舌道之)

善男子此之神呪。乃是三万如来之所宣说共所加护。我今亦复说此神呪。为欲利益一切有情。令得安乐常作拥护。除其病苦生诸佛国。

若复有人作如是念。如佛所说神呪功德。我今云何而能成就。即于晨朝早起清淨。于一切有情兴大慈悲发怜愍心。除诸嫉妬憍慢瞋恚。恭敬一心于佛像前。香花饮食广兴供养。礼十方佛心祈所愿。诵此神呪满一百八遍。于一一遍各呪一花。以一一花供养于佛。此人即便随所愿求。悉皆如意。亦于梦中得见诸佛。临命终时覩佛菩萨。舍身之后必得往生极乐世界。寿命色力悉皆具足。一切怨讎并生欢喜。说此呪时六万有情得无生法忍。永除诸障所愿满足。

尔时世尊说此经已。观自在菩萨妙吉祥菩萨。一切大众闻佛所说欢喜奉行。

## 佛说庄严王陀罗尼呪经

---

【经文信息】大正藏第 21 册 No. 1375 佛说庄严王陀罗尼咒经

【版本记录】CBETA 电子佛典 Rev. 1.8 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

---